

摘藻堂四庫全書薈要

經部

欽定四庫全書薈要

經部

春秋闕疑卷十五

六五




欽定四庫全書薈要卷一千六百六十四

經部

春秋闕疑卷十五

元 鄭玉 撰

十有三年春狄侵衛

 胡氏曰齊桓公為陽穀之會是肆于寵樂其行荒矣
楚人伐黃而救兵不起是忽于簡書其業荒矣然後

狄人窺伺中國今年侵衛明年侵鄭近在王都之側
淮夷亦來病杞而不忌也伯益戒于舜曰無怠無荒
四夷來王此至誠無息帝王之道春秋之法也齊桓

晉文若此類者其事則直書于策其義則游聖門者
默識于言意之表矣故曰仲尼之徒無道桓文之事
者

夏四月葬陳宣公

公會齊侯宋公陳侯衛侯鄭伯許男曹伯于鹹

十一年夏楊距泉臯伊維之戎同伐京師入王城焚
東門王子帶召之也秦晉伐戎以救周秋晉侯平戎
于王十二年王以戎難故討王子帶秋王子帶奔齊

冬齊侯使管夷吾平戎于王王以上卿之禮享管仲
管仲辭曰臣賤有司也有天子之二守國高在若節
春秋來承王命何以禮焉陪臣敢辭王曰舅氏余嘉
乃勲應乃懿德謂督不忘往踐乃職無逆朕命管仲
受下卿之禮而還是年春齊侯使仲孫湫聘于周且
言王子帶事畢不與王言歸復命曰未可王怒未怠
其十年乎不十年王弗召也夏會于鹹淮夷病杞故
且謀王室也十六年王以戎難告于齊齊徵諸侯而

戊周二十二年富辰言于王曰請召太叔詩曰協比
其隣婚姻孔云吾兄弟之不協焉能怨諸侯之不睦
王悅王子帶自齊復歸于京師王召之也 高郵孫
氏曰鹹之會二傳皆無事迹惟左氏以為謀杞且謀
王室案王室之事不載于經而明年經書城緣陵前
目後凡則謀杞之說與經合矣

秋九月大雩

冬公子友如齊

十有四年春諸侯城緣陵

諸侯城緣陵而遷杞焉 高郵孫氏曰緣陵之地經
不言杞者杞未遷也不叙諸侯而凡言之者會鹹之
諸侯于是復合而城之前目後凡春秋之簡辭也去
年之冬經書公子友如齊則是公子友受命魯公而
聘諸侯也公子友受命而聘則齊魯之君皆當反其
國矣然經不再叙之者以去年定其謀今年終其役
事無殊異國無增損可以簡言之矣胡氏曰齊桓城

三國而書辭不同城楚丘則沒諸侯而不書城緣陵則書諸侯而不序城邢則再序三國之師何也邢以自遷為文再序三師而書城邢者美其得救患分災之義也淮夷病杞諸侯會鹹城緣陵而遷杞焉其事專矣故前目後凡直書諸侯而不序也衛為狄滅東涉渡河野處漕邑桓公使公子無虧戍以甲士歸其祭服乘馬凡為國之用其力尤勤其功尤大其事尤專而春秋責之尤重曰城楚丘而不書諸侯正王法

也是故以功言之則楚丘為大以義言之則城邢為美春秋之法明其道不計其功正其義不謀其利者也詳著城邢之師深沒楚丘之迹貴王賤伯羞稱桓文以正待人之體也明此則知曾西不為管仲深畏仲由之說矣

夏六月季姬及鄆子遇于防使鄆子來朝

鄆季姬來寧公止之以鄆子之不朝也夏遇于防使來朝也 胡氏曰春秋內女適人者明有所從則繫

諸國若杞伯姬是也其未適人者欲有所別則書其字若子叔姬是也季姬書字而未繫諸國其女而非婦亦明矣及者內為志內女而外與諸侯遇譏魯也朝不言使言使非正鄆子國君而季姬使之朝病鄆也魯秉周禮男女之際豈其若是之甚乎蓋魯公鍾愛其女使自擇配故得與鄆子遇于防而遂以季姬歸之非所以愛而厚其別也故稱及稱遇稱使罪魯與鄆以正男女之禮為後世戒也高郵孫氏曰傳以

李姬歸寧而公止之故遇于防而使之朝案春秋內
女適他國者必書歸李姬未嘗言歸于鄆而明年始
書之又經不曰鄆李姬明其未歸也左氏徒見醜惡
之甚以為必不至此故曲為之解文姜哀姜之行有
甚于此者矣李姬之事經書之甚明無足疑也樸鄉
呂氏曰豈其許嫁于鄆而未歸于鄆乎家氏曰僖公
號賢君畧無正家之法魯之不競實由于此春秋書
此而李姬之惡狀見矣僖公何以辭其責

秋八月辛卯沙鹿崩

晉卜偃曰期年將有大咎幾亡國穀梁氏曰林屬于山為鹿沙山名也無崩道而崩故志之公羊氏曰外異不書此何以書為天下記異也高郵孫氏曰春秋災異之志必言其國沙鹿梁山崩皆非魯地而春秋書之如內辭焉此聖人之意也夫水火之為災石鷁之為異地不過百里時不過數日所以召之者止于其君所以應之者盡于一國故國不可不著也至

于王道大壞彞倫攸斁而天下之人皆反皇極則天
見其變而日食星孛地見其妖而川竭山崩所以召
之者在于天下所以應之者徧于四海則雖在于國
不得著其國也日有食之星孛于某其變之大其應
之廣不可以一國言也沙鹿崩梁山崩雖在于晉而
異及于天下不可以晉言也許氏曰恒星不見星隕
如雨齊桓之祥也沙鹿崩晉文之祥也齊桓將興而
天文隳晉文欲作而地理決王道之革也

狄侵鄭

許氏曰前年狄侵衛今年狄侵鄭而莫或攘之桓志之衰也王伯之政兢兢不可怠也齊桓之烈盛茂如此一矜而易心生之則狄屢入侵中國是以先王屢省成功而率作興事修誠慎憲務以戒終也

冬蔡侯肸卒

十有五年春王正月公如齊

高氏曰公十年如齊朝矣今又朝之五年一朝者諸

侯事天子之禮也今移之于齊侯可乎

楚人伐徐

徐即諸夏故也

三月公會齊侯宋公陳侯衛侯鄭伯許男曹伯盟于牡丘遂次于匡公孫敖帥師及諸侯之大夫救徐

盟于牡丘尋葵丘之盟且救徐也孟穆伯帥師及諸侯之師救徐諸侯次于匡以待之謝氏曰救患之師如解焚拯溺緩而不急則失救之道桓之救徐也

八國已受盟矣其終也諸侯止而不進大夫帥師以
出其救難不力可知也為隣國謀而不盡其心為不
忠視人危急而遷延不進為不仁大者止而小者行
為不義三者齊桓失救之道也然則遂救許遂之善
者也以其進也遂次于匡遂之不善者也以其止也
胡氏曰楚都于郢距徐亦遠而舉兵伐徐暴橫憑陵
之罪著矣徐在山東與齊密邇以封境言之不可以
不速救以形勢言之非有餽糧越險之難也今書盟

于牡丘見諸侯救患之不協矣書次于匡見桓德益
衰而禦夷狄安中國之志怠矣凡兵而書救未有不
善之救而書次則尤罪其當速而故緩失用師之義
矣中庸曰至誠無息不息則久春秋謹始卒欲有國
者敦不息之誠也始勤而終怠則不能久而固其國
矣陳氏曰諸侯在而大夫將于是始桓公為之也則
桓志荒矣

夏五月日有食之

秋七月齊師曹師伐厲

伐厲以救徐也 薛氏曰厲楚漢東之與國也楚師東出而伐其與國固用兵之道也不役諸侯而專曹師之用求救微矣無救于徐之敗理也

八月螽

九月公至自會

季姬歸于鄆

胡安定先生曰歸者始嫁之辭高郵孫氏曰季姬之

歸不言所逆逆者鄆子也內女之歸不書逆皆其君
自來逆之常事不書爾李姬惡行當絕而春秋書之
與內女之歸無異蓋李姬之貶已見於遇鄆子于防
之時于是但以恩錄之爾

己卯晦震夷伯之廟

於是展氏有隱慝焉 高氏曰春秋遇朔書朔遇晦
書晦蓋聖人因事而書晦朔之法使後世得以考焉
杜氏曰夷伯魯大夫展氏之祖父左氏曰震夷伯之

廟罪之也穀梁氏曰因此見天子至于士皆有廟天子七諸侯五大夫三士二故德厚者流光德薄者流卑是以貴始德之本也始封必為祖權子曰春秋所書皆天人嚮應有致之道如石隕于宋而言隕石夷伯之廟震而言震夷伯之廟此天應之也但以淺狹之見以為無應其實皆應之然漢儒推災異皆牽合不足信儒者有厭於此因盡廢之謝氏曰慝惡之人使之居廟以享血食天之所惡也夷伯盖有慝惡于

魯而子孫猶以宗廟事之然則雷震其廟乃天惡夷
伯而殛之也故春秋書之以示天戒焉師氏曰魯大
夫之廟而雷震之彼天之威豈妄加于宗廟鬼神邪
是必廟之踰制而子孫為魯用事之臣又不敢廢之
故天震之以示變盈之道也

冬宋人伐曹

討舊怨也 師氏曰自莊十四年曹嘗助齊以伐宋
至此三十五年矣邇來未見其隙及齊侯伯中國二

國同與盟會者十數矣今宋無故而侵曹乃以舊怨
藉口而謂之伐宋公之可罪也明矣此其所以人之
與陳氏曰諸夏之交兵自莊之十九年未之有也于
是再見宋襄公為之也許氏曰同盟始相攻伐桓不
能一矣則何以禁夷狄之亂伯德方衰諸侯浸以貳
也威靈之陵夷豈不惜哉家氏曰桓公志怠宋見間
而起于此知宋襄之為人外靜內躁于桓之方存已
有圖伯之心矣

楚人敗徐于婁林

徐恃救也 家氏曰春秋初年猶未狄徐至此以後

徐方以號舉師氏曰前此三月諸侯之大夫嘗救徐而令則楚人敗徐于婁林中國之威不足以震夷狄而當時所救無益也明矣齊桓之伯得不衰乎張氏曰書以見楚兵之獨勝而救徐之功不立伐厲之謀無補也陳氏曰不數年宋楚爭盟以是為盟主病矣十有一月壬戌晉侯及秦伯戰于韓獲晉侯

晉侯之入也秦穆姬屬賈君焉且曰盡納羣公子晉侯烝于賈君又不納羣公子是以穆姬怨之晉侯許賂中大夫既而皆背之賂秦伯以河外列城五東盡虢略南及華山內及解梁城既而不與十三年冬晉荐饑使乞糴于秦秦伯謂子桑與諸乎對曰重施而報君將何求重施而不報其民必攜攜而討焉無衆必敗謂百里與諸乎對曰天災流行國家代有救災恤隣道也行道有福平鄭之子豹在秦請伐晉秦伯

曰其君是惡其民何罪秦于是乎輸粟于晉自雍及絳相繼命之曰汎舟之役十四年冬秦饑使乞糴于晉晉人弗與慶鄭曰背施無親幸災不仁貪愛不祥怒隣不義四德皆失何以守國虢射曰皮之不存毛將安傅慶鄭曰棄信背隣患孰恤之無信患作失援必斃是則然矣虢射曰無損于怨而厚于寇不如勿與慶鄭曰背施幸災民所棄也近猶讐之况怨敵乎弗聽退曰君其悔是哉十五年秦伯伐晉卜徒父筮

之吉涉河侯車敗詰之對曰乃大吉也三敗必獲晉
君其卦遇蠱曰千乘三去三去之餘獲其雄狐夫狐
蠱必其君也蠱之貞風也其悔山也歲云秋矣我落
其實而取其材所以克也實落材亡不敗何待三敗
及韓晉侯謂慶鄭曰寇深矣若之何對曰君實深之
可若何公曰不孫卜右慶鄭吉弗使步揚御戎家僕
徒為右乘小駟鄭入也慶鄭曰古者大事必乘其產
生其水土而知其人心安其教訓而服習其道惟所

納之無不如志今乘異產以從戎事及懼而變將與
人易亂氣狡憤陰血周作張脉僨興外彊中乾進退
不可周旋不能君必悔之弗聽九月晉侯逆秦師使
韓簡視師復曰師少于我鬪士倍我公曰何故對曰
出因其資入用其寵饑食其粟三施而無報是以來
也今又擊之我怠秦奮倍猶未也公曰一夫不可狃
況國乎遂使請戰秦伯使公孫枝對曰君之未入寡
人懼之入而未定列猶吾憂也苟列定矣敢不承命

韓簡退曰吾幸而得囚士戍戰于韓原晉戎馬還潭而止公號慶鄭慶鄭曰復諫違卜固敗是求又何逃馬遂去之梁由靡御韓簡號射為右輅秦伯將止之鄭以救公誤之遂失秦伯秦獲晉侯以歸穆姬聞晉侯將至以太子瑩弘與女簡璧登臺而履薪焉使以兔服衰絰逆且告曰上天降災使我兩君匪以玉帛相見而興戎若晉君朝以入則婢子夕以死夕以入則朝以死惟君裁之乃舍諸靈臺大夫請以入公曰

獲晉侯以厚歸也既而喪歸焉用之大夫其何有焉
公子繫曰不如殺之無聚慝焉子桑曰歸之而質其
太子必得大成晉未可滅而殺其君祇以成惡且史
佚有言曰無始禍無怙亂無重怒重怒難任陵人不
祥乃許晉平晉侯使卻乞告瑕呂飴甥且召之子金教
之言曰朝國人而以君命賞且告之曰孤雖歸辱社稷
矣其卜貳圉也衆皆哭晉于是乎作爰田呂甥曰君亡
之不恤而羣臣是憂惠之至也將若君何衆曰何為而

可對曰征繕以輔孺子諸侯聞之喪君有君羣臣輯睦甲兵益多好我者勸惡我者懼庶有益乎衆說晉于是乎作州兵十月晉陰飴甥會秦伯盟于王城秦伯曰晉國和乎對曰不和小人恥失其君而悼喪其親不憚征繕以立圉也曰必報讐寧事戎狄君子愛其君而知其罪不憚征繕以待秦命曰必報德有死無二以此不和秦伯曰國謂君何對曰小人感謂之不免君子恕以為必歸小人曰我毒秦秦豈歸君君

子曰我知罪矣秦必歸君貳而執之服而舍之德莫厚焉刑莫威焉服者懷德貳者畏刑此一役也秦可以伯納而不定廢而不立以德為怨秦不其然秦伯曰是吾心也改館晉侯饋七牢焉蛾析謂慶鄭曰盍行乎對曰陷君于敗敗而不死又使失刑非人臣也臣而不臣行將焉入十一月晉侯歸丁丑殺慶鄭而後入是歲晉又饑秦伯又餽之粟曰吾怨其君而矜其民且吾聞唐叔之封也箕子曰其後必大晉其庸

可冀乎姑樹德焉以待能者于是秦始征晉河東置
官司焉十七年夏晉太子圉為質于秦秦歸河東而
妻之二十二年太子圉將逃歸謂羸氏曰與子歸乎
對曰子晉太子而辱于秦子之欲歸不亦宜乎寡君
之使婢子侍執巾櫛以固子也從子而歸棄君命也
不敢從亦不敢言遂逃歸 胡氏曰秦伯伐晉而經
不書伐專罪晉也獲晉侯以歸而經不書歸免秦伯
也書伐書及者兩俱有罪而以及為主書獲書歸者

兩俱有罪而以歸為甚今此專罪晉侯之背施幸災
貪愛怒隣而怨秦伯也然則秦戰義乎春秋無義戰
彼善于此則有之矣其不言師敗績何也君獲不言
師敗績君重于師也大夫戰而見獲必書師敗績師
與大夫敵也君為重師次之大夫敵春秋之法也與
孟子之言何以異孟子為時君牛羊用人莫之恤也
故以民為貴君為輕春秋正名定分為萬世法故以
君為重師次之堯以天下命舜舜亦以命禹必稱元

后為先此經世大常而仲尼祖述之也惟此義不行
然後叛逆之黨有託以為名輕棄君親而不顧者矣
十有六年春王正月戊申朔隕石于宋五是月六鷁退
飛過宋都

隕石于宋五隕星也六鷁退飛過宋都風也周内史
叔興聘于宋宋襄公問焉曰是何祥也吉凶焉在對
曰今茲魯多大喪明年齊有亂君將得諸侯而不終
退而告人曰君失問是陰陽之事非吉凶所生也吉

凶由人吾不敢逆君故也 高郵孫氏曰是月者別
非戊申之日也不書日者所不知闕之也權子曰隕
石于宋自空凝結而隕六鵠退飛倒逆而飛必有氣
驅之也如此等皆是異事故書之胡氏曰石鵠隕飛
而得其數與名在春秋時凡有國者察于物象之變
亦審矣此宋異也何以書于魯史亦見當時諸國有
非所當告而告者矣何以不削乎聖人因災異以明
天人感應之理而著之于經垂戒後世如石隕于宋

而書曰隕石此天應之也和氣致祥乖氣致異人事感于下則天變應于上苟知其故恐懼修省變可消矣張氏曰星隕為石不祥也六鷁退飛不順也宋襄欲圖伯而無其德故天出怪異以警懼之卒之五年被執六年兵敗天之示人顯矣高氏曰聖人之于災祥不敢必其有亦不敢必其無若必其無則有國者不復畏天若必其有則後世將妄推象類以求天意所在其弊有不可勝言若漢世圖讖之學是也故聖

人于災祥存之而不辨使人知所戒而已昔高宗祭成湯有飛雉升鼎耳而雊祖已訓諸王曰唯先格王正厥事不言其吉凶禍福唯使正厥事而已此先王處災祥之法也春秋書災祥之旨蓋不異祖已之意三月壬申公子季友卒

胡氏曰季者其字也友者其名也大夫卒而書名則曷為稱字聞諸師曰春秋時魯卿有生而賜氏者季友仲遂是也生而賜氏者何命之世為卿也季子忠

賢在僖公有翼戴之勤襄仲弑逆在宣公有援立之力此二君者不勝私情欲以異賞報之也故皆生而賜氏俾世其官經于其卒各以氏書者誌變法亂紀之端權臣竊柄之禍其垂戒遠矣

夏四月丙申鄆季姬卒

胡氏曰內女嫁于諸侯則尊同尊同則記其卒記其卒則必記其葬然而有不記者此筆削之旨非可以例求者也宋伯姬在家為淑女既嫁為賢婦死于義

而不回此行之超絕卓異者既書其葬又載其謚僖公鍾愛李姬使自擇配李姬不能自克以禮恃愛而行雖書其卒因奪其葬所以謹夫婦之道正人倫之統明王教之始也

秋七月甲子公孫茲卒

冬十有二月公會齊侯宋公陳侯衛侯鄭伯許男邢侯曹伯于淮

謀鄆且東畧也城鄆役人病有登城而呼曰齊有亂

不果城而還 樸鄉呂氏曰北伐山戎南伐楚西為
葵丘之盟東會于淮桓公之威加于天下者畧徧矣
此伯者之極盛也

十有七年春齊人徐人伐英氏

齊人為徐伐英氏以報婁林之役也 高郵孫氏曰

英氏近于楚而附屬之齊桓以楚之強而暴中國也
于是會徐人伐之且為徐申其忿也高氏曰為徐伐
楚而不加兵于楚乃移兵于英氏非所以攘夷狄而

救中國也謝氏曰桓公無東畧之志可知也

夏滅項

師滅項淮之會公有諸侯之事未歸而取項齊人以
為討而止公 權子曰滅人之國罪惡大矣在君則
當諱故魯滅國書取滅項君在會季孫為之也故不
諱胡氏曰執政之臣擅權為惡而不與之諱此春秋
尊君抑臣不為朋黨比周之意也陳氏曰書滅項失
兵權之漸也襄公在晉書邾庶其來奔昭公在晉書

莒牟夷來奔皆非常也春秋之季大夫不稟命于諸侯非但魯也鄭伯會于夷儀鄭公孫舍之帥師入陳蔡侯會于召陵蔡公孫姓帥師滅沈春秋必謹而志之

秋夫人姜氏會齊侯于卞

聲姜以公故會齊侯于卞謝氏曰卞魯邑齊侯自淮還師而夫人出會焉張氏曰大臣滅項而止僖公刑已偏頗又會婦人于魯地此管仲既亡桓公志荒

之會也高氏曰卞之會夫人以齊侯止公故其情則可而禮則不可也

九月公至自會

冬十有二月乙亥齊侯小白卒

齊侯之夫人三王姬徐嬴蔡姬皆無子齊侯好內多內寵內嬖如夫人者六人長衛姬生武孟少衛姬生惠公鄭姬生孝公葛嬴生昭公密姬生懿公宋華子生公子雍公與管仲屬孝公于宋襄公以為太子雍

巫有寵于衛共姬因寺人貂以薦羞于公亦有寵公
許之立武孟管仲卒五公子皆求立冬十月乙亥齊
桓公卒易牙入與寺人貂因內寵以殺羣吏而立公
子無虧孝公奔宋十二月乙亥赴辛巳夜殯 愚按
孔子曰管仲相桓公霸諸侯一匡天下民到于今受
其賜微管仲吾其被髮左衽矣又曰桓公九合諸侯
不以兵車管仲之力也如其仁如其仁孟子曰五霸
三王之罪人也又曰仲尼之徒無道桓文之事者誦

此則齊桓之行事可知而功過不得相掩矣蓋王者之學至誠無偽純亦不已故商周之盛傳世之遠至七八百年澤猶未泯霸者之術假公濟私始勤終怠故桓公身死未幾五子爭立國內大亂誠偽之分禍福如此可不畏哉權子曰得天理之正極人倫之至者堯舜之道也用其私心依仁義之偏者霸者之事也王道如砥本乎人情出乎禮義若履大路而行無復回曲霸者崎嶇反側於曲徑之中而卒不可與入

堯舜之道故誠心而王則王矣假之以霸則霸矣二者其道不同在審其初而已易所謂差若毫釐繆以千里其初不可不審也故治天下必先立其志志立則邪說不能移異端不能惑故力進于道而莫之禦也苟以霸者之心而求王道之成是銜石以為玉也故仲尼之徒無道桓文而曾西恥比管仲義所不由也五峯胡氏曰齊亦公侯之地耳管仲得政遂能強大霸諸侯何也守信不貳行法無移舉用賢才開闢

言路不藉樹蓄務富民財不大興兵務舒民力休尊王之義會于首止天子憚其正而王室之亂消寧魯難誅哀姜公道伸而諸侯服盟于召陵制荆楚而中國之義立城衛楚丘城邢夷儀遷杞緣陵而夷狄不得肆此其所以九合諸侯虎視中原之大畧也若夫伐魯國以殺子糾而父子兄弟之恩薄五大夫立子頽出天王不能奔命而君臣之義虧魯晉宋有弑君之賊而不能討也陳有殺嫡立庶之罪而不能正也



鄭有兄弟爭國之禍而不能平也以不從已則伐宋
伐鄭伐陳執濤塗厚自封殖滅譚滅遂處已若是何
以服人于是北則晉專冀方西則秦專雍土南則荆
楚強橫滅弦滅黃圍許伐徐而終不退聽也原其失
皆由不知天理之本而馳心于功利之域故無以得
天下心而功烈如彼其卑也其去王也遠矣大東萊
呂氏曰桓公雖能用管仲攘夷狄霸諸侯有一匡天
下之功然仲本無正心誠意格君之學徒急于一時

之功利卒至五子之亂其所以有始無終者家法之
不正也管仲且有三歸之失豈能正其君哉樸鄉呂
氏曰霸圖之興小白為之首霸權之重小白為之盛
小白未興之前天下不知有王小白既興以後天下
始知有霸天下不知有王君子以為憂也天下始知
有霸君子又豈以為喜乎然是時也有相盟者矣而
未有合諸侯以同盟者合諸侯以同盟者自小白始
有相會者矣而未有合諸侯以大會者合諸侯以大

會者自小白始方其列國爭衡侯度無統亦誠有望
于方伯連帥之功然而大合諸侯糾率列國同盟而
有主盟同會而有主會其事則前此所未有也而小
白創為之是以當時諸侯亦疑焉而未至北杏之會
小白圖霸之始也舉天下而聽命于一邦向未之有
也魯為是疑焉遲遲而不至至莊二十七年再盟于
幽則始授之諸侯矣自是而后會于櫟盟于貫會于
陽穀盟于首止于甯母于洮于葵丘于鹹于牡丘于

淮諸侯無一役之不從焉召陵之役諸侯之大夫一語不中則其身見執而其國見伐首止之盟鄭伯逃歸則新城之圍伐鄭之師連年不捨不至于乞盟不已葵丘之會幾于改物淮之會其霸既衰之時也魯猶以滅項之故而見止焉是則合天下而聽命于一邦者未有如桓公之盛也是故北杏之會諸侯遲焉而未至葵丘之會諸侯奔走而畢從遲焉而未至者是諸侯猶不敢以事周者事齊也奔走而畢從者是

諸侯不敢不以其事王者事霸也霸圖之盛王迹之
泯歟然則諸侯之所以從小白者其故何也曰春秋
之初王綱浸弛天下未有知尊周者小白起而倡為
尊周之義春秋之初列國分爭諸侯未有寧處者小
白起而執其安中國之權春秋之初夷狄恣橫莊閔
之際益以強盛當時莫有能攘却之者小白起而振
其攘夷狄之功故讀隱桓之春秋則見天下之無王
而紛紛者莫之一也讀莊閔僖之春秋則見天下之

有霸而擾擾者有所依也是則霸圖之興固天下之至幸也然桓隱之間天下雖不知有王而王之實猶存何者王之威令雖不行而其權猶未有所移也閔僖之間天下既知有霸而王之實已泯何者移其所以事王者而事霸也是則霸圖之盛又非天下之至不幸歟故嘗謂小白未興之前是一時也小白既興之後是一時也小白既卒之後是一時也王綱浸弛莫提挈之侯度無統莫糾率之戎狄恣橫莫攘却之

此小白未興之時也五禁明而王臣不下聘者四十
二年盟會同而諸侯無所爭者三十年帖荆退狄弭
戎威夷此小白既興之時也天王出居而官守不問
衛滅懿親而義師無討楚書子而主盟狄書人而參
盟此小白既卒之時也然小白一身亦三變焉伐郕
侵宋侯度不一入蔡侵鄭戎疾未殄滅譚滅遂履事
未久施設多乖遇穀盟扈閔理未熟檢防是肆蓋小
白圖霸之初也貫澤而下葵丘以前衣裳不歆血兵

車無大戰夫子稱其一匡孟子與其為盛在此數年
此小白定霸之日也九國叛而震矜萌管仲死而繩
墨廢城杞貶于城邢救徐急于救許此小白成霸之
後也驗春秋大勢之三變則小白為有功觀桓公一
身之三變而其功亦為不遠徐攷顛末而小白之事
可得而知矣

十有八年春王正月宋公曹伯衛人邾人伐齊夏師救
齊五月戊寅宋師及齊師戰于甌齊師敗績狄救齊

宋襄公以諸侯伐齊三月齊人殺無虧齊人將立孝公不勝四公子之徒遂與宋人戰夏五月宋敗齊師于鄆立孝公而還 穀梁氏曰非伐喪也胡氏曰伐齊之喪奉少奪長其罪大故其責詳書救齊者善魯也救者善則伐者惡矣凡書救未有不善之也書狄救齊者許狄也許夷狄則罪諸夏矣許之曷為不稱人深著中國諸侯之罪也凡伐者為客受伐者為主今齊人受伐以宋為主者曲在宋也凡師直為壯曲

為老書齊師敗績者責齊臣也或曰桓公管仲嘗屬
孝公于宋襄以為世子矣則何以不可立乎曰不能
制命雖天王欲撫鄭伯以從楚春秋猶以大義裁之
而不與也桓公君臣乃欲以私愛亂長幼之節其可
哉春秋深罪宋公大義明矣 愚謂古之為學者物
格而後知至知至而後意識意識而後心正心正而
後身修身修而後家齊家齊而後國治國治而後天
下平其為功自內以及外其為效由近以及遠故修

身以治其國而國無不治者矣桓公不知正心誠意之學惟以趨事赴功為務故其攘夷狄安中國雖有一時之功身死未幾五子爭立鄰國交伐由其身之不修家之不齊知治其外而不知治其內知治于人而不知治于身也桓公之德如此固可見矣宋襄公方欲圖伯諸侯以安中國而首亂人少長之序伐與國之喪則其伯業之不遂又何待執于孟而後見哉則有天下國家者可不知所以為學乎

秋八月丁亥葬齊桓公

樸鄉呂氏曰讀此編者自齊小白卒至葬齊桓公當作一類看胡氏曰桓公九合諸侯不以兵車威令加乎四海幾于改物雖名方伯實行天子之事然而不能慎終如始付託非人柩方在殯四隣謀動其國家而莫之恤至于九月而後葬以此見功利之在人淺矣春秋明道正義不急近功不規小利于齊桓晉文有所貶而無過褒以此

冬邢人狄人伐衛

圍菟圃衛侯以國讓父兄子弟及朝衆曰苟能治之
燬請從焉衆不可而後師于訾婁狄師還 愚按穀
梁氏曰狄伐衛救齊故進而稱人然以經考之狄救
齊齊亂定而後葬桓公今又踰時矣邢人始與狄人
伐衛安得為救齊也師氏曰聖人之心遂肯以一事
與夷狄乎家氏曰果善之何不于救齊之際而善之
今乃于伐衛而進之蓋春秋書邢人狄人伐衛者責

邢不當與狄比而伐與國也謝氏曰邢人引狄以為
中國患先邢人罪以首患也薛氏曰狄之書人何齒
乎邢也狄邢衛之寇讐也邢衛嘗同患難者也幸乎
方伯之死交寇讐以伐同患取亡之道也

春秋闕疑卷十五

欽定四庫全書薈要卷一千六百六十五

經部

春秋闕疑卷十六

元 鄭玉 撰

十有九年春王三月宋人執滕子嬰齊

高氏曰此宋襄求霸也求霸而執滕子春秋之俗也俗者何雖齊桓亦滅譚滅遂降鄆皆無名也特兼弱以威而已滕子何以名執而名之者不反之辭也莊十六年幽之會齊桓始霸滕子與焉既而背之自此之後至齊侯卒凡三十七年衣裳兵車之會未嘗列

于其間故此年宋襄既有圖霸之心而首執滕子以令諸侯也然宋襄圖霸當以德懷來之今乃肆已之強擅執國君以凌轢諸夏執而不反亦以甚矣此春秋所以人宋也

夏六月宋公曹人邾人盟于曹南

臨江劉氏曰曹南曹之南也謝氏曰宋襄內無遠略而欲隆霸業以紹齊桓于是首為曹南之盟從之者曹人邾人而已諸侯不服可知也與北杏之會異矣

高郵孫氏曰曹邾皆稱人者蓋宋襄威德未著曹邾但使其臣會之

鄆子會盟于邾已酉邾人執鄆子用之

宋公使邾文公用鄆子于次睢之社欲以屬東夷司馬子魚曰古者六畜不相為用小事不用大牲而況敢用人乎祭祀以為人也民神之主也用人其誰饗之齊桓公存三亡國以屬諸侯義士猶曰薄德今一會而虐二國之君又用諸淫昏之鬼將以求霸不亦

難乎得死為幸

劉氏意林曰曹南之會雖有邾人

即非邾子今此會盟于邾者詳驗經文是邾國自為盟會非復向者曹南之盟也若宋公使邾人執鄆子而春秋越宋治邾是為首惡者不誅而脅從者見討也春秋原心定罪豈其若是哉吾固曰宋不使邾用鄆子也家氏曰槩觀宋襄公平日則好名而畏義者也方其為太子以讓國聞其後與楚人戰欲以不禽二毛不鼓不成列而取仗義之名豈有今日而用同

盟國君于淫昏之社無道若此者乎高郵孫氏曰邾
之與鄆世讐之國故宣十八年又戕鄆子于其國都
但邾鄆小國其相讐之迹不能悉見經惟紀其無道
之甚者爾用之之說三傳不同左氏以為用之于次
睢之社公穀皆以為叩其鼻血至昭十一年楚人執
蔡世子友以歸用之杜預以為祭山公羊則以為築
防趙子之徒又以為用為盟歆之牲皆不同也然考
之于經但曰用之不云所用之迹蓋春秋之時有用

人為牲者大亂之極聖人所不忍言但曰用之則知
以人為用也不必以正其名所重者用之而已 愚
按劉氏之說與傳文雖異於經為合然無所據又會
盟于邾之文他無此例不敢以為決然姑著其疑以
俟知者

秋宋人圍曹

討不服也子魚言于宋公曰文王聞崇德亂而伐之
軍三旬而不降退修教而復伐之因壘而降詩曰刑

于寡妻至于兄弟以御于家邦今君德無乃猶有所闕而以伐人若之何盍姑內省德乎無闕而後動

陳氏曰諸夏之書圍國自此始胡氏曰盟于曹南口血未乾今復圍曹者討不服也愛人不親反其仁治人不治反其智襄公不能內自省德而急于合諸侯執嬰齊非霸討不足以示威盟曹南非同志不足以示信卒於兵敗身傷不知反求諸已欲速見小利之過也張氏曰齊桓之霸屈意去忿盟魯平宋以致諸

侯先近故也今襄公欲圖諸侯近于宋者莫如曹滕
滕既執矣曹又被圍宜其不遂霸也家氏曰當是時
鄭入滑狄侵衛魯伐邾以中國無霸而動也宋襄苟
能治其所當治則義聲暢而霸業成矣此春秋所望
于宋襄者故比事以見義

衛人伐邢

秋衛人伐邢以報菟圃之役于是衛大旱卜有事於
山川不吉甯莊子曰昔周饑克殷而年豐今邢方無

道諸侯無伯天其或者欲使衛討邢乎從之師興而雨高氏曰衛不伐狄而伐邢是以人之左氏謂師興而雨不亦誣哉薛氏曰非王命而擅征伐怨以報怨而已

冬會陳人蔡人楚人鄭人盟于齊

陳穆公請修好于諸侯以無忘齊桓之德冬盟于齊修桓公之好也杜氏曰地于齊齊亦與盟胡氏曰盟會皆君之禮也微者盟會不志于春秋凡所志者

必有君與貴大夫居其間也然則為此盟者乃公與陳蔡楚鄭之君或其大夫曷為內則沒公外則人諸侯與大夫諱是盟也楚人之得與中國會盟自此始也莊十年荆敗蔡師始見于經其後入蔡伐鄭皆以號舉夷狄之也僖公元年改而稱楚經亦書人于是乎浸強矣然終桓公世皆止書人而不得與中國會盟者以修霸業能制其強故也桓公既沒中國無霸鄭伯首朝于楚其後遂為此盟故春秋沒公人陳蔡

諸侯而以鄭列其下者蓋深罪之也又二年復盟于
鹿上至會于孟遂執宋公以伐宋而楚于是乎大張
列位于陳蔡之上而書爵矣聖人書此豈與之乎所
以著夷狄之強傷中國之衰莫能抗也故深諱此盟
一以外夷狄二以惡諸侯之失道三以謹盟會之始
也

梁亡

十八年梁伯益其國而不能實也命曰新里秦取之

至是春遂城而居之初梁伯好土功亟城而弗處民
罷而弗堪則曰某寇將至乃溝公宮曰秦將襲我民
懼而潰秦遂取梁左氏曰梁亡不書其主自取之
也公羊氏曰此未有伐者其言梁亡何自亡也其自
亡奈何魚爛而亡也穀梁氏曰湎于酒淫于色心昏
耳目塞上無正長之治大臣背叛民為寇盜梁亡自
亡也陸氏微旨曰梁伯亟用其民自取滅亡其罪當
矣秦人肆其強暴取人之國沒而不書其義安在曰

乘人之危其惡易見也滅人之國其罪易知也自取滅亡其意微矣春秋之作聖人所以明微也胡安定先生曰大抵邦國用賢則存失賢則亡賢既不用上下放恣百度頽圯何止于土工刑法淫威而已哉故梁之自亡失賢而亡也胡氏曰天行健君子以自強不息古之諸侯朝修其禁令晝攷其國職夕省其典刑夜儆百工無使惰淫而後即安故克勤于邦荒度土工者禹也慄慄危懼檢身若不及者湯也自朝至

于日中昃不遑暇食用咸和萬民者文王也凡有國
家者土地雖廣人民雖衆兵甲雖多城郭雖固而不
能自強于政治則日危月削如火銷膏以至滅亡而
莫覺也而況好土工輕民力湏于酒淫于色心昏而
出惡政者乎其亡可立而待也

二十年春新作南門

高郵孫氏曰春秋之法言新則有舊也言作則有加
也因其舊而制度有加焉所謂新作也胡氏曰書新

作南門譏用民力于所不當為也魯人為長府閔子

騫曰仍舊貫如之何何必改作孔子曰夫人不言言必有中春秋凡用民力得其時制者猶書于策以見勞民為重事而沉輕用于所不當為者乎然僖公嘗修泮宮復閔宮矣奚斯董其役史克頌其事而經不書者宮廟以事其祖考學校以教國之子弟二者為國之先務雖用民力不可廢也其垂戒之意深矣高氏曰諸侯宮城之門皆有定制輒更舊制而增大之

罪不止于勞民而已

夏郃子來朝

五月乙巳西宮災

公羊氏曰西宮者小寢也有西宮則有東宮矣穀梁氏曰以是為閔宮也胡安定先生曰若是閔宮則明書新宮不得謂之西宮也此西宮蓋公之別宮也家氏曰小寢人君燕私之地災見于是警戒深矣人君之過不在朝路臨蒞之時而常在于深宮燕處之際

天之示譴豈徒然哉

鄭人入滑

滑人叛鄭而服于衛夏鄭公子士洩堵寇帥師入滑
家氏曰自齊桓公沒諸侯動兵相侵弱小漸被其毒
宋襄苟欲踵霸當稟王命會諸侯伸要束而懲之如
鄭人入滑皆當糾也舍是不為而執滕圍曹強人從
已烏能有成

秋齊人狄人盟于邢

齊狄盟于邢謀衛難也于是衛方病邢 家氏曰甚
哉齊昭之愚無知也桓公征楚而服之已乃與之盟
于國桓公攘狄而却之已乃與之盟于邢反常逆理
抑至于是傳曰厥父菑厥子乃不肯播厥父基厥子
乃弗肯堂其齊昭之謂乎春秋儕齊于狄亦所以狄
齊也廉恥道喪則相與淪于滅亡而已矣

冬楚人伐隨

隨以漢東諸侯叛楚冬楚鬬穀於菟帥師伐隨取成

而還 襄陵許氏曰楚既服隨則將爭衡上國矣而
宋欲盟之其能絀乎師氏曰楚在齊桓之世雖未至
于竄伏然亦未至于太甚今齊桓既死乃敢與諸侯
盟于齊以萌圖霸之心又肆征伐以示可畏之威諸
侯無能為者明年遂有鹿上之盟及秋又有孟之會
于是執宋公以伐宋先書齊之盟繼書隨之伐所以
明楚之幾微已動于此而宋不悟也

二十有一年春秋侵衛

張氏曰因邢之盟也孝公不能嗣父之業楚狄皆因之以為中國患此齊邢之盟所以兩書而邢衛並受其禍也許氏曰中國無霸則諸侯力攻四夷衡決民被其災此書伐衛伐邢入滑伐隨侵衛著無霸之患也家氏曰為中國患者狄與楚也楚強大未易治狄悍而微自桓公之沒再侵衛彼謂衛人失霸國之援而可欺也宋襄與其盟楚而求諸侯盍若伐狄以寧諸夏能治狄而霸政舉矣顧乃舍其力之所可及義

之所當為而為其所不可為狂躁害之也

宋人齊人楚人盟于鹿上

二十年宋襄公欲合諸侯臧文仲聞之曰以欲從人則可以人從欲鮮濟至是宋人為鹿上之盟以求諸侯于楚楚人許之公子目夷曰小國爭盟禍也宋其亡乎幸而後敗師氏曰齊侯圖霸惟以攘夷狄為辭故能假仁義以為盟主凡與諸侯會盟或主王人或主王世子或主宰周公不然則中國五等之諸侯

而止耳今宋欲圖霸乃與楚人為鹿上之盟夷夏雜處不知何以令諸侯而成霸業乎小東萊呂氏曰宋襄欲霸乃求楚所會之諸侯蓋楚子有意執之故許之也齊晉所以霸皆先弱楚楚與中國其勢不兩立桓公有葵丘之會晉文有城濮之戰所以攘夷狄安中國而成霸業也宋襄欲霸反求諸侯于楚安能攘夷狄安中國與齊晉並霸乎宜其見辱于楚也張氏曰霸中國者宋之欲也亂中國者楚之欲也欲霸中

國而求之于夷狄亂常之楚與之同盟此春秋所以
列序而人之以著襄公之自取敗辱也陳氏曰齊桓
卒宋襄欲繼之而伯而求諸侯于楚楚于是爭長於
宋則是盟也莫適為主人自為盟而已矣

夏大旱

公欲焚巫尪臧文仲曰非旱備也修城郭貶食省用
務穡勸分此其務也巫尪何為天欲殺之則如勿生
若能為旱焚之滋甚公從之是歲也饑而不害 高

郵孫氏曰春秋之記災異有曰不雨者旱不為災陰陽不和之異也有曰大雩者旱未為災非時而雩也有曰大旱者旱而為災非常也旱而為災則不雨矣不雨淺于旱也旱則雩矣言雩未見其災也春秋書大旱者二非常為災之辭也師氏曰不月以見其經時焉高氏曰以二百四十二年而兩大旱何其少也曰所謂大旱者非特吾國也舉天下言之也

秋宋公楚子陳侯蔡侯鄭伯許男曹伯會于孟執宋公

以伐宋

諸侯會宋公于孟子魚曰禍其在此乎君欲已甚其何以堪之于是楚執宋公以伐宋 陳氏曰宋楚初爭長也是故楚稱子而序陳蔡鄭許曹之上不知諸侯之從楚與從宋與不予宋以霸也公羊氏曰曷為不言楚子執之不與夷狄之執中國也高氏曰執宋公者楚也而繫于在會諸侯執之之辭何也所以深罪在會之諸侯也南面之君兵非不多而力非不足

也而聽蠻夷執辱中國主盟之君而莫之敢違其不
勇于為義亦甚矣雖宋德不足懷慮不及遠力求諸
侯以及于難而諸侯甘心事夷狄以致夷狄侵凌中
國此罪不可貸故以諸侯共執為文不使夷狄專執
中國諸侯也張氏曰按公羊傳曰宋公與楚子期以
乘車之會公子目夷諫曰楚夷國也強而無義請以
兵車往會宋公曰不可吾與之約為乘車之會自我
為之自我墮之不可楚人果伏兵車執宋公以伐宋

夫孔子相定公會齊侯此會中國也猶以為文事不
可無武備請司馬以行以楚之夷而可信其詐偽之
約徒手出會之是輕以其身溷于虎狼之羣也不免
宜矣胡氏曰春秋為賢者諱宋公見執不少隱之何
也夫盟主者所以合天下之諸侯攘夷狄尊王室者
也宋公欲繼齊桓之烈而與楚盟會豈攘夷狄尊王
室之義乎故人宋公于鹿上之盟而孟之會直書而
不隱所以深貶之也家氏曰春秋正名之書也楚自

熊通以來妄自尊大遂僭王者之隆名春秋每以號
舉不使之得與中國諸侯齒今楚益強盛合諸侯詐
以執宋公中國一大變也春秋以楚子書夫豈進而
爵之乎四夷雖大曰子彼革號僭王以兵猾夏春秋
序以子爵所以正其始封之名辨夷夏之分孰云其
漸進夷狄乎自是而後楚始書子正名也或曰如子
所言始何以書荆人今何以書楚子乎曰始其來聘
僭號于國中耳春秋姑以號舉今會于齊盟于鹿上

諸侯畏其強大有以事王者而事之春秋于是正其
始封之名書之曰予示天王之尊乃天下共主非夷
狄所得干也自是而後楚之憑陵無不書子何爵之
有哉高郵孫氏曰春秋因會而執諸侯惟二處孟之
會楚人執宋公而不言楚人湟梁之會晉侯執莒子
邾子而斥言晉人二事畧同而書之異辭者聖人之
意也孟之會中國之諸侯隨盟主而會夷狄夷狄執
宋公以伐宋又代夷狄而伐之罪不責于楚子諸侯

實同之也。溴梁之會，晉侯以大義帥諸侯而會焉。執莒邾之君者，晉侯也以信會而以詐執之，可責者晉侯也。蓋春秋之輕重與奪，惟義所在爾。

冬公伐邾

高氏曰：是舉也不為無義。至明年伐邾，取須句，則魯之情可見矣。不書邾滅須句者，罪公聽婦人之言而興兵以伐婚姻之國，因以為已利也。

楚人使宜申來獻捷

穀梁氏曰捷軍得也其不曰宋捷何也不與楚捷於
宋也高氏曰中國于夷狄則有捷諸侯于天子則有
獻捷今所獻者宋捷也所使宜申者楚子也楚子所
以來獻捷者致公也聖人不予夷狄反捷乎中國故
書楚人來獻而不云宋捷也楚與諸侯同伐宋而魯
不與焉及得宋捷特使宜申來誇示以威魯蓋欲致
魯侯來聽盟也高郵孫氏曰春秋書獻捷者二齊稱
戎捷捷山戎也山戎則可捷矣而獻有罪焉不得沒

戎捷而不言也宋襄求霸而不果至于見執而伐之
宋中國也而夷狄捷之夷狄安得捷吾中國乎不曰
宋捷不以中國而捷于夷狄也中國無見捷于夷狄
之理也無其理則不言焉所以護中國而法後世也
陳氏曰孟會不稱予無以見楚宋之爭長獻捷于魯
不人之則是遂予楚也胡氏曰諸侯從楚伐宋而魯
獨不與故楚來獻捷以脅魯為魯計者拒其使而不
受可也請于天王而討之可也宋公先代之後作賓

王家方修盟會而伏兵車執之于壇坫之上又以軍
獲遺獻諸侯其橫逆甚矣拒其使而不受聲其罪而
致討何患無辭家氏曰當是時舉中國之大無有能
辨斯事者晉文不興楚之禍中國亦何所不至乎
十有二月癸丑公會諸侯盟于薄釋宋公

會于薄以釋之子魚曰禍猶未也未足以懲君 公
羊氏曰執未有言釋者此其言釋之何公與議爾也
穀梁氏曰不言楚不與楚專釋也高氏曰公本不附

楚因宜申來獻宋捷之故不敢不與楚會而書會諸侯者以諸侯皆在是故前目後凡且見公之續至也執宋公釋宋公皆楚子耳前之執宋公既以諸侯共執為文此又蒙上諸侯共釋為文者聖人抑制夷狄不使楚子得以專執釋中國之諸侯懲荆舒之意也蘇氏曰凡諸侯見執而不失國者于歸名之書曰某侯某歸于某此其不名而言釋何也以為執之釋之皆在諸侯也若是而尚可求諸侯乎師氏曰孟之會

宋為主而楚次之諸侯皆居其中今執宋公伐宋之後乃有薄之盟也是此盟也楚為主矣不序以惡之且著夷夏雜處不復有上下尊卑焉春秋扶持中國而攘却夷狄之意不亦嚴乎胡氏曰會未有言其所為獨會于稷書成宋亂者為受郛鼎立華督也會于澶淵言宋災故者為葬蔡侯不討般也盟不書所為而盟于薄言釋宋公者宋方主會荆楚執而伐之以其俘獲來遺是荆楚反為中國主異類將逼人而食

之矣此正天下大變春秋之所謹也魯既不能申大義以抑其強暴使宋公見釋出自天王與中國而顧與敵血要言求楚子以釋之是操縱大權自蠻夷出其事已僨甚矣故書會盟書釋皆不言楚子謝氏曰襄公為宗廟社稷人民主始也諸侯會于孟若罪人執之于會終也諸侯盟于薄若罪人釋之于盟其危辱至此者皆以不量力不度德取之而已有國家其動可不戒耶

二十有二年春公伐邾取須句

任宿須句顓臾風姓也實司大皞與有濟之祀以服事諸夏二十一年邾人滅須句須句子來奔因成風也成風為之言于公曰崇明祀保小寡周禮也蠻夷猾夏周禍也若封須句是崇皞濟而修祀紓禍也至是伐邾取須句反其君焉 胡安定先生曰僖公伐邾非伐其罪但利其土地而已陳氏曰春秋嚴義利之辨苟以為利一以取書之是故雖邾人滅須句須

句子來奔伐邾取須句反其君焉書取須句

夏宋公衛侯許男滕子伐鄭

三月鄭伯如楚夏宋公伐鄭子魚曰所謂禍在此矣
高氏曰齊桓既沒楚又強大鄭伯比楚以圖自安
宋襄雖被執見釋而圖霸之心未已鄭伯度宋之不
霸首背中國而改事楚故宋率衛許滕四國共伐之
春秋皆與其爵以明討得其正也 愚謂宋襄有志
無才卒于自敗其伐鄭也亦異于齊桓矣惜哉

秋八月丁未及邾人戰于升陘

邾人以須句故出師公卑邾不設備而禦之臧文仲
曰國無小不可易也無備雖衆不可恃也詩曰戰戰
兢兢如臨深淵如履薄冰又曰敬之敬之天惟顯思
先王之明德猶無不難也無不懼也況我小國乎君
其無謂邾小蠱蠆有毒而況國乎弗聽八月丁未公
及邾師戰于升陘我師敗績邾人獲公冑縣諸魚門
謝氏曰不書公與敗諱之也升陘之戰由須句所致

曲皆在我故以內為戰主而惡之也胡氏曰魯既敗績邾亦幾亡輕用師徒害及兩國亦異于誅暴禁亂之兵矣張氏曰存心苟公臨事必懼觀此則知春取須句非有存亡繼絕之公心審矣薛氏曰以魯而為邾敗大不足恃兵不可窮也如此

冬十有一月己巳朔宋公及楚人戰于泓宋師敗績楚人伐宋以救鄭宋公將戰大司馬固諫曰天之棄商久矣君將興之弗可救也已弗聽冬十一月己巳

朔宋公及楚人戰于泓宋人既成列楚人未既濟司馬曰彼衆我寡及其未既濟也請擊之公曰不可既濟而未成列又以告公曰未可既陳而後擊之宋師敗績公傷股門官殲焉國人皆咎公公曰君子不重傷不禽二毛古之爲軍也不以阻隘也寡人雖亡國之餘不鼓不成列子魚曰君未知戰勅敵之人隘而不列天贊我也阻而鼓之不亦可乎猶有懼焉且今之勅者皆吾敵也雖及胡者獲則取之何有于二毛

明恥教戰求殺敵也傷未及死如何勿重若愛重傷則如勿傷愛其二毛則如服焉三軍以利用也金鼓以聲氣也利而用之阻隘可也聲盛致志鼓儼可也師氏曰前乎宋公齊桓嘗圖霸矣與諸侯會盟養威近三十年而後伐楚後乎宋公晉文嘗圖霸矣與賢臣謀議作三德以示民然後伐楚此無他定而後發發期必中自度不辱于夷狄而後可動故齊桓晉文既服楚而霸業遂定今宋公欲圖霸未見如何養威

如何作德既嘗失計而與楚會盟又無備而為楚所
執如是而欲圖霸不亦難乎復不自悟懷忿不平及
楚人而與之戰則是忿兵也徒知在我以中國攻夷
狄於理為直獨不念動非其念誰與為援姑恃理直
而可以必成功耶自謂可成功而卒為楚所敗故書
曰宋師敗績謝氏曰不書楚人侵伐者楚來救鄭而
襄公與之戰也戰由宋起故以宋人主戰而罪之選
賢才緝政治親內睦外以振國綱服楚之道也襄公

乃於危難之中逞復讐之怨率破傷之衆以當強楚之鋒襲古人陳迹以待楚之變詐是以衆敗身傷終以取亡前書伐鄭後書戰敗罪其不知反也隕石于宋六鷁退飛過宋異之大者也襄公不知恐懼修省且又輕舉妄動以遂私欲而禍不旋踵及身然則上天變異其可不畏耶胡氏曰宋襄公不扼人于險不鼓不成列公羊以謂至仁大義雖文王之戰不能過也而春秋不與何哉物有本末事有終始順事恕施

者王政之本也襄公伐齊之喪奉少奪長使齊人有
殺無虧之惡有敗績之傷此晉獻公之所以亂其國
者罪一也桓公存三亡國以屬諸侯義士猶曰薄德
而一會虐二國之君罪二也曹人不服盍姑省德無
闕然後動而興師圍之罪三也凡此三者不仁非義
襄公敢行而愛重傷與二毛則亦何異盜跖之以分
均出後為仁義陳仲子以避兄離母居於陵為廉乎
夫計末遺本飭小名妨大德者春秋之所惡也故辭

繁不殺而宋公書及以深貶之也高郵孫氏曰孔子
曰我戰則勝非謂能戰而勝也勝之道素修而無敵
于天下也豈若宋襄之道不修而苟拘小信乎公羊
殆未知文王之戰爾胡安定先生曰襄公無桓公之
資欲紹桓公之烈以宗諸侯以致強楚故孟之會被
執受伐今復與楚爭鄭衆敗身傷喪師泓水七月而
死為中國羞惜哉蓋有善志無其才取辱夷狄而羞
及中國也

二十有三年春齊侯伐宋圍緡

以討其不與盟于齊也 胡安定先生曰宋伐齊使

殺無虧而立孝公今齊侯反伐之是宋自召其伐之
之禍然齊伐人之國又圍其邑其惡甚矣故聖人備
志之胡氏曰齊霸國之餘業也宋襄公既敗于泓荆
楚之勢益張矣齊侯既無尊中國攘夷狄恤患災畏
簡書之意又乘其弱而伐之此尤義之所不得為者
也故書伐國而言圍邑以著其罪然則桓公伐鄭圍

新城何以不為貶乎鄭與楚合憑陵中國桓公伐之攘夷狄也宋與楚戰兵敗身傷齊侯伐之殘中夏也其事異矣美惡不嫌同辭家氏曰齊昭非宋襄之力則齊之一亡公子耳宋襄不忘齊桓臨終之託為昭盡力昭所以有國甌一戰之功也今乘其敗而伐之蓋以是諂于夷楚求為自全之計以怨報德刑戮之民或曰何以猶爵曰春秋有書爵以褒者有目其人之身而書某公某侯以著其罪者若齊昭之書侯謂

其身受宋公之大德而忍于為不義故目其人而誅之

夏五月庚寅宋公茲父卒

傷于泓故也 謝氏曰智小而謀大力少而任重未有不終于敗者也襄公以庸暗之才貪遠大之業方其盟于鹿上志欲合諸侯朝齊楚豈知後之勢敗身亡為天下笑哉故君子動必度德進必量力 愚案宋襄公自齊桓之末年即有圖霸之心雖桓公君臣

亦望之以繼霸之事故屬之以其子卒之師敗身傷
幾至亡國霸業無成抑鬱以死者由其徒慕仁義之
名而不識仁義之實以于是也夫齊桓公知仁義
之為美假之而未能有者猶取仁義之功宋襄公聞
仁義之為美慕之而不能識者反為仁義之賊于是
冥行妄作以殘暴為義以姑息為仁非特不能至乎
仁義而遂陷于不仁不義矣故其始也齊桓方卒而
伐其喪滕人來會而執其君曹人不服而圍其國是

蓋以殘暴為義也其終也不以兵車雜乘車不鼓不成列不重傷不禽二毛則以姑息為仁矣所為顛倒繆亂若此得保首領以沒幸矣尚何望其能霸乎是以大學之道其始也必先之以格物致知則無宋襄之失其後也必本之以誠意正心則無齊桓之弊斯其所以為聖賢之學帝王之道也與

秋楚人伐陳


楚成得臣帥師伐陳討其貳于宋也遂取焦夷城頓

而還子文以為之功使為令尹叔伯曰子若國何對
曰吾以靖國也夫有大功而無貴仕其人能靖者與
有幾 家氏曰陳穆公請修好于齊以無忘桓公之
德而齊之會楚人亦得列于其間名為修齊桓舊好
其實自結于強楚今楚人乃以其貳于宋而伐之何
耶蓋楚夷也諸夏實恥于從之而迫于凶威有不容
自己者陳也介于二者之間猶欲自附于宋不忍遽
從于夷是以楚疑而伐之若蔡若鄭則甘于從夷而

不悔無復羞惡之心矣

冬十有一月杞子卒

春秋闕疑卷十六



覆校官編修 臣曹 城

校對官庶吉士 臣朱 攸

膳錄貢生 臣潘沛然

膳錄舉人 臣呂燕昭